

新刻陳養晦先生傷寒五法卷之四

東海石楷臨初父撰述

門人

沈 宋洪皓
沈 熊虞賓

全校

仲景傷寒論愈證纂

傷寒三日脉浮數而微病人身涼和者此爲欲解也
解以夜半脉浮而解者濺然汗出也脉數而解者必
能食也脉微而解者必大汗出也

傷寒三日陽去入陰之時病人身熱脉浮數而大
者邪氣傳也若身涼和脉浮數而微者則邪氣不

傳而欲解也解以夜半者陽生於子也脉浮主濺
然汗出而解者邪從外散也脉數主能食而解者
胃氣和也脉微主大汗出而解者邪氣微也

寸口關上尺中三處大小浮沉遲數同等雖有寒熱
不解者但脉陰陽和平雖劇當愈

三部脉均等卽正氣和也雖有餘邪何害之有
病六七日手足三部脉皆至大煩而口噤不能言其
人躁擾者必欲解也

煩熱也傳經之時病人身大煩口噤不能言內則

躁擾是陰陽爭勝若手足三部脉皆至爲正氣勝邪氣微陽氣復寒氣散必欲解也

若脉和其人大煩目黃臉內際黃者此爲欲解也

脉經曰病人兩目皆有黃色見者其病方愈病以脉爲主若目黃大煩脉不和者邪氣勝也其病爲進目黃大煩而脉和者爲正氣已和故云欲解

假令病人云腹內卒痛病人自坐脉之浮而大者知其差也蓋裏有病者脉當沉而細今脉浮大故知愈也

腹痛者裏寒也痛甚則不能起而脉沉細今病人
自坐而脉浮大者裏寒散也是有表脉而輕裏證
也則裏邪當愈是望證問病切脉三者相參而得
之可爲十全之醫鍼經曰知一爲上知二爲神知
三神且明矣

病人發熱煩極明日師到病人向壁臥此熱去也
發熱極則不能靜臥今向壁臥知熱已去

其不兩感於寒更不傳經不加異氣者至七日太陽

病衰頭痛少愈也八日陽明病衰身熱少歇九日少

陽病衰耳聾微聞十日太陰病衰腹減如故則思飲食十一日少陰病衰渴止舌乾已而噦十二日厥陰病衰囊縱小腹微下邪氣皆去病人精神爽慧也

六日傳遍三陰三陽之氣皆和邪氣皆去故精神爽慧也

凡得病反能飲食此爲欲愈之病其不時病者但聞病飲水自愈小渴者乃強與飲之因成其禍不可復救

小渴者爲腹中熱少若強與水水飲不消復爲病

也

凡得病厥脉動數服湯藥更遲脉浮大減小初躁後靜此皆愈證也

動數之脉邪在陽也湯入而變遲者陽邪愈也浮大之脉邪在表也湯入而復減小者表邪散也病初躁亂者邪所煩也湯入而安靜者藥勝病也三者是皆爲愈證

傷寒一日太陽受之脉若靜者爲不傳頗欲吐若煩躁脉數急者爲傳也

太陽主表一日則太陽受邪至二日當傳陽明若
脉氣微爲不傳也陽明胃經受邪則喜吐寒邪傳
裏者則變熱如煩欲吐若煩躁脉急數者爲太陽
受邪變熱傳於陽明也

風家表解而不了了者十二日愈

中風家發汗解後未全快暢者十二日火邪皆去
六經悉和則愈

病人臟無他病時發熱自汗出而不愈者此衛氣不
和也先其時發汗則愈宜桂枝湯主之

傷寒五論
臟無他病裏和也衛氣不和表病也外臺云裏和
表病汗之則愈所謂先其時者先其發熱汗出之
時發汗則愈

凡病若發汗若吐若下若亡津液陰陽自和者必自
愈

重亡津液則不能作汗必待陰陽自和乃自愈矣
大下之後復發汗小便不利者亡津液故也而治之
得小便利必自愈

因亡津液而小便不利者不可以藥利之俟津液

足小便利必自愈也

太陽病未解脉陰陽俱停必先振慄汗出而解但陽脉微者先汗出而解但陰脉微者下之而解欲下之宜調胃承氣湯主之

脉陰陽俱停勻無偏勝者陰陽氣和也經曰寸口關上尺中三處大小浮沉遲數同等此脉陰陽和平雖劇當愈今陰陽既和必先振慄汗出而解但陽脉微者陽不足而陰有餘也經曰陽盛陰虛下之則愈

欲自解者必當先煩乃有汗而解何以知之脉浮故知汗出而解也

煩熱也邪氣還表則爲煩熱汗出而解以脉浮故爲邪還表也

脉陽微而汗出少者爲自和也汗出多者爲太過脉陽微者邪氣退也汗出少者爲適當故自和汗出多者反損正氣是汗出太過也

傷寒三日三陽爲盡三陰當受邪其人反能食而不嘔此爲三陰不受邪也

傷寒四日表邪傳裏裏不和則不能食而嘔今反能食而不嘔是邪不傳陰但在陽也

傷寒三日少陽脉小者欲已也

內經曰大則邪至小則平傷寒三日邪傳少陽脉當強緊今脉小者邪氣微而欲已也

少陰病脉緊至七八日自下利脉暴微手足反溫脉緊反去者爲欲解也雖煩下利必自愈

少陰病脉緊者寒甚也至七八日傳經盡欲解之時自下利脉暴微者寒氣得洩也若陰寒勝正陽

虛而洩者則手足厥而脉緊不去今手足反溫脉
緊反去知陽氣復寒氣去故爲欲解下利煩躁者
逆此正勝邪微雖煩下利必自愈

少陰中風脉陽微陰浮者爲欲愈

少陰中風陽脉當浮而陽脉微者表邪緩也陰脉
當沉而陰脉浮者裏氣和也陽中有陰陰中有陽
陰陽調和故爲欲愈

厥陰中風脉微浮爲欲愈不浮爲未愈

經曰陰病見陽脉者生浮者陽也厥陰中風脉微

浮爲邪氣還表向汗之時故云欲愈

厥陰病渴欲飲水少少與之愈

邪至厥陰爲傳經盡欲汗之時渴欲求水者少少與之胃氣得潤則愈

傷寒病厥五日熱亦五日設六日當復厥不厥者自愈終不過五日以熱五日故知自愈

陰勝則厥陽勝則熱先厥五日爲陰勝至六日陽復勝熱亦五日後復厥者陰復勝若不厥爲陽全勝故自愈經曰發熱四日厥反三日復熱四日厥

少熱多其病爲愈

厥猶冷也

仲景傷寒論死證纂

脉浮而洪身汗如油喘而不休水漿不下形體不仁
乍靜乍亂此命絕也

病有不可治者爲邪氣勝於正氣也內經曰大則
病進又曰大則邪至脉浮而洪者邪氣勝也身汗
如油喘而不休正氣脫也四時以胃氣爲主水漿
不下者胃氣盡也人身以榮衛爲充形體不仁榮
衛絕也不仁言痛癢俱不知也鍼經曰榮衛不行

爲不仁爭則亂安則靜乍靜乍亂者正與邪爭正
負邪勝也正氣已脫胃氣已盡榮衛俱絕邪氣得
勝故曰命絕也

又未知何臟先受其災若汗出髮潤喘不休者此爲
肺絕也

肺爲氣之主爲津液之帥汗出髮潤津脫也喘不
休者氣脫也

陽反獨留形體如烟薰直視搖頭此心絕也

肺主氣心主血氣爲陽血爲陰陽反獨留則爲身

體大熱是血先絕而氣猶在也形體如烟薰者爲身無精華是血絕不榮於身也心脉挾咽系目直視者心經絕也頭爲諸陽之會搖頭者陰絕而陽無根故也

唇吻反青四肢縶習者此爲肝絕也

唇吻者脾之候肝色青肝絕則真色見於所勝之部也四肢者脾所主肝主筋肝絕則筋脉引急發於所勝之分也縶習者爲振動若搖擗手足時時

引縮也